

Inatsisartut Suleriaasianni § 33 naapertorlugu aalajangiiffigisassatut siunnersuut Naalakkersuisut matumuuna saqqummiuppaat:

Uunga siunnersuut: Danskisut innuttaassuseqarneq pillugu inatsisip Kalaallit Nunaanni atuutilersinneqarnerat pillugu Namminersorlutik Oqartussat peqquneqarnissaannut akuerissagaat pillugu Inatsisartut aalajangiinerat.

(Isumaginninnermut, Suliffeqarnermut, Ineqarnermut, Attaveqaasersuutinit, Isorliunerusunullu Naalakkersuisoq)

Tunngavilersuut

Namminersorlutik Oqartussat ulloq 2. februar 2026, Danmarkimiit Nunani Allamiunut Akuunerulersitsinermullu Ministereqarfimmit allakkamik tigusaqarpoq, matumani qallunaatut innuttaassuseqarneq pillugu inatsisip allanngortinneqarnera pillugu inatsisit assigiinngitsut Kalaallit Nunaannut atulersinneqarneri pillugit peqqussutip missingiutaani Naalakkersuisut oqaaseqaataat noqqaassutigineqarput.

Inatsisip pingaarnertut imarisai ukuupput:

Qallunaatut innuttaassuseqarneq pillugu inatsit Kalaallit Nunaannut atuuttoq inatsimmik nalunaarut nr. 2307, 8. december 2020-meersukkut kingullermik nalunaarutigineqarpoq.

Inatsimmik nalunaarut atuuttoq piffissami 25. juni 2014-miit 13. december 2016-mut allannguutinik imaqarpoq, Kalaallit Nunaannilu peqqussuteqarnikkut nr. 1677-ikkut 24. november 2020-mi atuutilersinneqarluni.

Danmarkimi naalagaaffimmi innuttaassuseqarneq pillugu inatsimmi atuuttumi kingusinnerusukkut arlalinnik allannguisoqarpoq, taakku killeqarfinnut aalajangersakkanut tamarmik ilaapput, taakkulu kunngip peqqussutaatigut Kalaallit Nunaannut atuutilersinneqarsinnaallutik.

Naalagaaffimmi tamarmiusumi naalagaaffiup innuttaassuseqarneq pillugu maleruagassartai tunngaviusumik aamma inatsisitigut tunngaviatigut assigiittariaqaralarput, taamaalilluni naalagaaffimmi tamarmi qallunaatut innuttaassuseqarnerup inatsisitigut sunniutai atuutsilissapput.

Peqqussummi missingiunneqartumi inatsimmik nalunaarut nr. 2307, 8. december 2020-meersoq nutarterneqassasoq siunnersuutigineqarpoq, taamaaliornikkut Kalaallit Nunaanni Danmarkillu akornanni naapertuunnerusumik qallunaatut innuttaassuseqarneq pillugu inatsimmik atuutilersitsisoqassalluni.

Kalaallit Nunaanni suut atulersinneqassanersut nalilersorneqarnerani, Kalaallit Nunaanni pissutsit eqqarsaatigineqarsimapput.

Peqqussutissatut missingiutikkut saqqummiunneqartukkut inatsimmik allanngorneri ilanngullugit nalunaarutiginninnerup nr. 2307-ip, 8. december 2020-meersup atuuttup

nutarterneqarnissaa siunnersuutigineqarpoq, taamaalilluni qallunaatut innuttaassuseqarneq pillugu inatsisip atuuttup Danmarkimi aamma Kalaallit Nunaanni naapertuutilernissaa missiliorneqarluni. Qallunaatut innuttaassuseqarneq pillugu inatsimmi allanngortitsinerit tulliuttut tamakkiisumik imaluunniit ilaannakortumik, Kalaallit Nunaanni pissutsinut naleqqussaanerit allannguutigalugit, Kalaallit Nunaannut atuutilersinneqarnissaat siunnersuutigineqarpoq:

- Qallunaatut innuttaassuseqarneq pillugu inatsisip aamma nunani allamiunut inersimasunut qallunaatut ilinniarnissaq il.il. pillugit inatsisip allanngortinneqarnissaat pillugu inatsimmi nr. 1735-imi, 27. december 2018-imeersumi (inatsit tunngaviusoq pillugu nalliuttorsiorpalaartumik katerisimaarnerit kommunalbestyrelsinut nuunneqarnerat, nunami allami inunngorsimanerup kingorna qallunaatut innuttaassuseqalernissamut qinnuteqaateqarnermi akiliutip qaffanneqarnera aamma qallunaatut ilinniartinneqarnermi nunami allamiut najuutinngittarnerat pillugu malittarisassat erseqqinnerusut aalajangersarneqarnerat il.il.), § 1.

Inatsit tunngaviusoq pillugu nalliuttorsiorpalaartumik katerisimaarnerit kommunalbestyrelsinut nuunneqarnerat kiisalu nunami allami inunngorsimanerup kingorna qallunaatut innuttaassuseqalernissamut qinnuteqaateqarnermi akiliutip 3.800 kr.-inut qaffanneqarnera, inatsimmik allanngortitsinerup kinguneraa.

Inatsit tunngaviusoq pillugu nalliuttorsiorpalaartumik katerisimaartitsinerit pillugit allanngortitsinerit Kalaallit Nunaannut atuutilersinneqarnissaat siunnersuutigineqanngimmat maluginiarneqassaaq, tassami nalliuttorsiorpalaartumik katerisimaartitsineri il.il., nunami allami inunngorsimanerup kingorna qallunaatut innuttaassuseqalernissaq pillugu kaajallaasitami nr. 9461-imi, 17. juni 2021-imeersumi § 2 A, imm. 2 malillugu nunami allami inunngorsimanerup kingorna qallunaatut innuttaassuseqalernissakkut qallunaatut innuttaassuseq pillugu qinnuteqartunut Kalaallit Nunaanni najugaqartunut peqataanissamik piumasaqaat piumasaqaataanngilaq. Qinnuteqarnermut akiliut kingusinnerusukkut inatsisikkut nr. 2057-ikkut, 16. november 2021-imeersukkut qaffanneqarmat, kisianni aalajangersagaq inatsisilerinikkut pitsaassutsinik isumannaarinninnerit pissutigalugit atuutilersinneqarnissaa siunnersuutigineqarmat, aammattaaq maluginiarneqassaaq. (Missingiummi § 1, nr. 23 aamma 24)

- Nunani allamiut pillugit inatsisip aamma qallunaatut innuttaassuseqarneq pillugu inatsisip allanngortinneqarneri pillugit inatsimmi nr. 173-imi, 27. februar 2019-imeersumi § 2 (nunami allamiut ukiukitsut inissinneqartarneri pillugit malittarisassat allanngortinneqarneri, nammineersinnaajunnaarsitaaneq pillugu suliani naammagittaalliorsinnaanerup aaqqinneqarnera, aallartitsineri nunani allamiut politiinit misissorneqartarnerat pillugu malittarisassat erseqqissarneqarnerat, Statsforvaltningip atorunnaarsinneqarnerata malittarisaanik piginnaatitsinerit allanngortinneqarneri il.il.)

Piginnaasaqarnerup statsforvaltningimiit Udlændinge- aamma Integrationsministereqarfimmut nuunneqarnera, inatsimmik allanngortitsinerup kingunerisimavaa.

Allanngortitsinermut inatsimmi § 2, nr. 2 peqqussutissatut missingiummi ilaatinneqannginnera maluginiarneqassaaq, tassami Naalagaaffiup Sinniisoqarfiata nalunaarummik itigartitsinera pillugu naammagittaalliuuteqarsinnaaneq innuttaassuseqarneq pillugu inatsimmi § 4 A, imm. 2-mi oqaaseqatigiit aappaata atorunnaarsinneqarnissaanik kinguneqartussaavoq.
(Missingiummi § 1, nr. 7)

- Qallutaatut innuttaassuseqarneq pillugu inatsisip aamma nunani allamiut pillugit inatsisip allanngortinneqarneri pillugit inatsimmi nr. 1057-imi, 24. oktober 2019-imeersumi § 1
(Nunami angerlarsimaffiginngisaminni sorsuttartut naalagaaffimmi innuttaassusaannik arsaarinninneq il.il)

Pineqartoq taamaaliornikkut naalagaaffimmi sumiluunniit innuttaassuseqarunnaassanngippat, inummut iliuutsimik, nunap pingaarutilimmik soqutigisaanik ilungersunartumik ajoqusiiisumik iliuuseqartumut, udlændinge- aamma integrationsministerip qallunaatut naalagaaffimmi innuttaassuseqarnermik arsaarinnissinnaanera, inatsisip allanngortinneqarneratigut eqqunneqarpoq. Tamatuma peqatigisaanik, paasissutissat suliap naliliiffigineqarnerani ilaasut suut, akuusumut imaluunniit udlændinge- aamma integrationsministerimut ingerlateqqinneqartarnissaat pillugit malittarisassat, kiisalu suliat taakku eqqartuussivinni misilinneqartarnerat pillugit malittarisassat eqqunneqarput.

Ulloq taanna nallertinnagu allatut aalajangiisoqanngippat, allanngortitsinermik inatsimmi § 3, imm. 2 malillugu inatsit ulloq 1. juli 2021 atorunnaarsinneqartussaana, Kalaallit Nunannut atuutilersinneqassanngimmat maluginiarneqassaaq, tassami aalajangersagaq kingusinnerusukkut inatsisikkut nr. 2228-ikkut, 29. december 2020-imeersukkut atorunnaarsinneqarpoq.
(Missingiummi § 1, nr. 20-imiit 22 ilanngullugu aalajangersakkat, aamma § 2, imm. 6)

Qallunaatut innuttaassuseqarneq pillugu inatsisip aamma nunani allani sullissiviit pillugit inatsisip allanngortinneqarneri pillugit inatsimmi nr. 63 af 28. januar 2020-imi § 1
(sumiiffinni nunamut isernissamut- aamma najugaqarnissamut inerteqquteqarfiusuni meeqqat naalagaaffimmi innuttaassusermik pissarsisinnaanerat, atassuteqaatini inummut pingaannginnerusumut ilungersunartumik pinerluuteqarsimannginnissamik imaluunniit iliuutsinik pinerluttuliornerusunik iliuuseqarsimannginnissamik

piumasaqaatit, qallunaatut innuttaassuseqarnerup annaaneqarnera aamma nunani allani sullissivinnit ikiorneqarnissap killilernerqarnera il.il.)

Tassuuna qitornaq naalagaaffimmi sumiluunniit innuttaassuseerutissanngippat, angajoqqaq taanna akuersisummik peqarani, aamma qallunaat, nunanit allamiut imaluunniit nunat tamat akornanni pisortat sullissinerannik imaluunniit suliaqartitsinerannik atasumik sulinani sumiiffimmut isersimappat aamma najugaqarpat, qitornat sumiiffinni nunamut isernissamut- aamma najugaqarnissamut inerteqquteqarfiusuni inuusimasut inunngornerminni angajoqqaaminit qallunaatut innuttaassuseqarnermik pissarsinnginnissaat pillugit malittarisassat ilaatigut inatsisip allanngortinneqarneratigut eqqunneqarput. Aammattaaq atassuteqaatini inummut pingaannginnerusumut aamma inummut nunami allami inunngorsimanerup kingorna qallunaatut innuttaassuseqalerniarluni nalunaaruteqartumut ilungersunartumik pinerluuteqarsimannginnissamik imaluunniit iliutsinik pinerluttuliornerusunik iliuseqarsimannginnissamik piumasaqaatit eqqunneqarput. Tassuuna qitornaq naalagaaffimmi sumiluunniit innuttaassuseerutissanngippat, qitornaq pineqartumit innuttaassutsimik pissarsisimappat, kialluunniit innuttaassuseqarnini annaappagu, taava pineqartup qitornaata innuttaassuseqarnini aamma annaasaqarsinnaanera pillugu malittarisassat eqqunneqarput. Qallunaatut innuttaassuseqarnerup annaaneqarneranik imaluunniit arsaarinnissutigineqarneranik suliat aammattaaq unionimi innuttaassuseqarnermik annaasaqarnissamik kinguneqarnissaanik, inatsisissatut siunnersuut naggataagut tunngassuteqarpoq.

(Missingiummi § 1, nr. 1, 2, 5, 9, 11, 12, 14 aamma 15, aamma § 2, imm. 3)

- Nunani allamiut pillugit inatsisip, nunasisunik inuiaqatigiinnut akulerutsitsineq pillugu inatsisip aamma inatsisip allat allanngortinneqarneri pillugit inatsimmi nr. 821-imi, 9. juni 2020-imeersumi § 2 (Malittarisassat piuminarsarneqarneri, matumani Udlændingenævniut naammagittaalliorsinnaaneq aamma isernissap inerteqqutigineqarnera, akiliutit utertillugit akilerneqarnissaannut annikitsuarakasiit pillugit killiliussap eqqunneqarnera, aallarnissamut piffissaliussap sivitsorneqarnissaanut piginaatitaaneq aamma piginnaatitaanerup allanngortinneqarnerata erseqqissarneqarnera, ilaatigut utertitsisarneq aamma nunamut tassunga isernissap inerteqqutigineqarnerani, peqqussummi ilaatinneqartuni, pingaarutillit erseqqissaavigineqarnerat pillugit anisitsisarnermi Danmarkip Schengenimi malittarisassanik atuinerata nalilersuffigineqarnerata malitseqartinneqarnera il.il.)

Akiliutit akilerneqartarnerat pillugit malittarisassat erseqqissaavigineqarnerat inatsimmik allanngortitsinerup kinguneraa, matumani akiliutinik utertillugit akiliinermi akiliutaavallaartut annikitsuarakasiit pillugit killiliussap eqqunneqarnera.

(Missingiummi § 1, nr. 25 aamma 27, aamma § 2, imm. 7)

- Nunani allamiut pillugit inatsisip, qallunaatut innuttaassuseqarneq pillugu inatsisip aamma angerlamut angalatitsineq pillugu inatsisip allanngortinneqarneri pillugit

inatsimmi nr. 1192-imi, 8. juni 2021-imeersumi § 2 (Visummit pillugit suliaasaqarfimmi nalinginnaasumik naammagittaalliorsinnaanerup eqqunneqarnera, visummit pillugit suliat ilaanni sunulluunniit pisinnaatitaaffeqalernissamut piffissap ingerlaqqaarnissaanik piumasaqaatit, diplomatinut sivisuumik visumminik atulersitsinissamut periarfissaliissutip pissarsiarineqarnera il.il., sulinissamut malittarisassat assigiinngitsut aaqqinneqarneri, namminerisamik illusimmaviit aamma qimaasutut isernissamik qinnuteqartunut ininik nammineq akilersukkanik illusimmaviit, nunani allamiunut ukiukitsunut katissimasunut imaluunniit aappariinnut immikkut illusimmaveqartitsinissap aallartinneqarnissaanut periarfissaliissutip erseqqissarneqarnera, ukiukitsut ilaqartinneqanngitsut inissinneqarnissat pillugit aalajangiinerit naammassineqarnerat aamma siusinnerusukkut qallunaatut naalagaaffimmi innuttaassusilinnut nalunaaruteqarnikkut naalagaaffimmi innuttaassuseqaqqilersinnaanerup eqquteqqinneqarnera il.il.)

Piffissami qallunaatut innuttaassuseqarnerup annaaneqarnerata aamma nalunaarummik nalunaaruteqarnerup akornani nalunaaruteqartoq imaluunniit inuk pingaannginneq piumasaqaatitaqanngitsumik nammineersinnaajunnaarsitaanermik eqqartuunneqarsimanngippat, soorlu aamma nalunaaruteqartoq, nunami allami inunngorsimasoq, 22-inik ukioqalinnginnermini naalagaaffimmi matumani najugaqarsimanissaa imaluunniit naalagaaffimmi matumani minnerpaamik ukiumik 1 sivisutigisumik najugaqarsimanissaa, siusinnerusukkut qallunaatut naalagaaffimmi innuttaassuseqartunut aamma pineqartup qitornaanut ulloq 1. juli 2026 tikillugu nalunaaruteqarsinnaaneq inatsisip allanngortinneqarnerata kinguneraa.
(Missingiummi § 1, nr. 10 aamma 26)

- Qallunaatut innuttaassuseqarneq pillugu inatsisip allanngortinneqarnera pillugu inatsit nr. 2056, 16. november 2021-imeersoq (Sydslesvigermiut qallunaatut misigisimasut meeraasa atassuteqaatini inuttut pingaannginnerusutut qallunaatut naalagaaffimmi innuttaassuseqalersinnaanerisa ammaanqequeqarnera)

Qitornaq Sydslesvigimi imaluunniit Kiel Kommunimi najugaqarpat aamma Sydslesvigimi imaluunniit Kiel Kommunimi qallunaat atuarfianni atuarsimappat imaluunniit paaqqinnittarfianni paaqqutarineqarsimappat imaluunniit angerlarsimaffimmi minnerpaamik ukiumi 1-mi paaqqutarineqarsimappat, Sydslesvigermiut qallunaatut misigisimasut qitornaat inuttut pingaannginnerusutut qallunaatut innuttaassuseqalersinnaanera periarfissaasoq, inatsisip allanngortinneqarnerata kingunerisimavaa.
(Missingiummi § 1, nr. 12)

- Qallunaatut innuttaassuseqarneq pillugu inatsisip allanngortinneqarnera aamma innuttaassuseqalernissamut misilitsinneq pillugu inatsisip 2015-imeersup atorunnaarsinneqarnera pillugu inatsit nr. 2057, 16. november 2021-imeersoq (Nunani avannarlerni naalagaaffimmi innuttaasunut 18-it 23-illu akornanni ukioqartunut nunami allami inunngorsimanerup kingorna qallunaatut

innuttaassuseqalersimasunut nalunaaruteqarnikkut innuttaassuseqalersinnaanerup atorunnaarsinneqarnera, innuttaassuseqalernissamut misilitsinnermi qallunaat naleqartitaat pillugit apeqqutit, inatsisip tunngaviusup nalliuttorsiorpalaartumik katerisimaarutigineqarnerani assamminnissaq pillugu malittarisassanik erseqqinnerusunik aalajangersaasinnaanermut piginnaatinneqarneq aamma akiliutip, nunami allami inunngorsimanerup kingorna qallunaatut innuttaassuseqalernissamut qinnuteqaateqarnermi akilerneqartussap qaffanneqarnera)

Nunani avannarlerni naalagaaffimmi innuttaasunut 18-it 23-illu akornanni ukioqartunut nunami allami inunngorsimanerup kingorna qallunaatut innuttaassuseqalersimasunut nalunaaruteqarnikkut innuttaassuseqalersinnaanerup atorunnaarsinneqarnera, nunami allami inunngorsimanerup kingorna qallunaatut innuttaassuseqalernissamut qinnuteqaateqarnermi akiliutip akilerneqartussap 4.000 kr.-inut qaffanneqarnera inatsisip allanngortinneqarnerata kinguneraa. Aammattaaq innuttaassuseqalernissamut misilitsinnermi inatsisip tunngavik nutaaq kiisalu inatsit tunngaviusup pillugu nalliuttorsiorpalaartumik katerisimaarutigineqarnerani inatsisitigut tunngavik nutaaq pillugu malittarisassat allat, inatsisip allanngortinneqarnerata kingunerisimavaa.

Innuttaassuseqalernissamut misilitsinneq pillugu allanngortitsinerit Kalaallit Nunaannut atuutilersinneqarnissaat siunnersuutigineqanngimmat maluginiarneqassaaq, tassami nunami allami inunngorsimanerup kingorna qallunaatut innuttaassuseqarnissaq pillugu qinnuteqartut Kalaallit Nunaanni najugaqartut, nunami allami inunngorsimanerup kingorna qallunaatut innuttaassuseqalernissaq pillugu kaajallaasitami nr. 9461-imi, 17. juni 2021-imeersumi ilanngussaq 4, nr. 4 malillugu Innuttaassuseqalernissamut misilitsinnermi 2021-imeersumi angusisimanerminnik uppersaanissami ilaatinneqanngillat. Taamatuttaaq inatsit nr. 1735, 27. december 2018-imeersup qulaani taaneqartoq malillugu, inatsisip tunngaviusup nalliuttorsiorpalaartumik katerisimaarutigineqarnerani malittarisassat allanngortinneqarnissaasa atuutilersinneqannginnissaat siunnersuutigineqarpoq. (Missingiummi § 1, nr. 6, 8, 13, 23 aamma 24)

- Qallunaatut innuttaassuseqarneq pillugu inatsisip allanngortinneqarnera pillugu inatsit nr. 453, 20. april 2022-immersoq
(Pissutsinut pillaatissiissutaasunut, naalagaaffiup pingaarluinnartumik soqutigisaanik ilungersunartumik ajoqusiisut pissutigalugit, naalagaaffimmi innuttaassutsimik arsaarneqarneq il.il)

Qallunaatut innuttaassuseqarnerup arsaarinnissutigineqartarnera pillugu malittarisassat allanngortinneqarneri, inatsisip allanngortinneqarnerata kingunerisimavaa, ilaatigut tamanna Danmarkip nunat tamat akornanni pisussaaffiitut akerliussanngippat, taamaalilluni inuk iliuutsimik pillaatissiissutaasinnaasumik iliuuseqarsimasoq, aamma

taamaaliormermigut iliuutsumik, naalagaaffiup pingaarutilimmik soqutigisaanik ajoquusiisimasog, eqqartuussutikkut qallunaatut innuttaassuseqarneranik arsaarneqassalluni. Tamanna Danmarkip nunat tamat akornanni pisussaaffiit akerliussanngippat, aamma qitornaq taamaaliornikkut naalagaaffimmi sumiluunniit innuttaassuseqanngitsunngussanngippat, pissutsit peqquserluutaasut malitsigisaanik kinaluunniit innuttaassusermik arsaarneqarpat, aamma pineqartup qitornaa eqqartuussutikkut innuttaassusermik arsaarneqarnissaa aammattaaq eqqunneqarpoq. (Missingiummi § 1, nr. 16-imiit 19 ilanngullugu aalajangersakkat, aamma § 2, imm. 4 aamma 5)

- Qallunaatut innuttaassuseqarneq pillugu inatsisip allanngortinneqarnera pillugu inatsit nr. 487, 13. maj 2023-imeersoq
- (Naalagaaffimmi innuttaassuseqarneq pillugu isumaqatigiisummi aalajangersakkap atortuulersinneqarnera)

Qitornap qallunaatut innuttaassuseqarnermik pissarsineranut pissutsit tunngaviusut, pissarsinermut tunngavigineqarsimasut, piujunnaarsimasut paasineqarpat, qitornaq qallunaatut innuttaassusermik pissarsisimanngitsutut isigineqassasog, inatsimmik allanngortitsinerup kingunerisimavaa. Qitornaq taamaaliornikkut naalagaaffimmi sumiluunniit innuttaassuseerutissappat imaluunniit pineqartup 18-iliinerata kingorna paasaqarneq pisimappat, taamaattoq tamanna atuutinngilaq. (Missingiummi § 1, nr. 1, 3 aamma 4, aamma § 2, imm. 2)

Naalakkersuisuniit siunnersuummut oqaaseqaatit

Naalakkersuisut siunnersuutimut oqaaseqaateqanngillat.

Pisortaqarfinnut aningaasatigut allaffissornikkullu sunniutit

Danskisut innuttaassuseqarneq pillugu inatsisip allannguutai kingulliit Kalaallit Nunaannut atuutsinneqalerpata, tamanna Namminersorlutik Oqartussanut aningaasaqarnikkut sunniuteqassanngilaq, tassami suliaasaqarfinni suliaasanik suliarinnittarneq danskisut oqartussaasuisa isumagisarimmassuk.

Inuussutissarsiutilinnut aningaasatigut allaffissornikkullu sunniutit

Danskisut innuttaassuseqarneq pillugu inatsisip allannguutai kingulliit Kalaallit Nunaannut atuutsinneqalerpata, tamanna inuussutissarsiortunut il.il. aningaasaqarnikkut sunniuteqassanngilaq.

Innuttaasunut aningaasatigut allaffissornikkullu sunniutit

Siunnersuut innuttaasunut aningaasaqarnikkut annertuunik sunniuteqarnermik malitseqassasog naatsorsuutigineqanngilaq. Danskisut innuttaassuseqarneq pillugu inatsisip allannguutai kingulliit Kalaallit Nunaannut atuutsinneqalerpata, tamatuma kingunerisaanik naalagaaffimmi innuttaassuseqarneq pillugu maleruagassat Kalaallit Nunaanni danskisut naalagaaffimmi innuttaassuseqartunut aamma assigiilissallutik, taakkuami tunngaviusumik aammalu inatsisinik peqquteqartumik taamaattariaqaraluarput.

Tusarniaaneq

Peqqussummut missingiut piffissami 17. december 2025 – 16. januar 2026 Naalakkersuisut tusarniaanermut nittartagaanni tamanut ammasumik tusarniaassutigineqarpoq.

Ilanngussat

1. Danskisut innuttaassuseqarneq pillugu inatsisip allannguutaasa Kalaallit Nunaanni atuutilersinneqarnerat pillugu peqqussummut missingiutip eqikkarneqarnera.
2. Danskisut innuttaassuseqarneq pillugu inatsisip Kalaallit Nunaanni atuutilersinneqarnerat pillugu peqqussummut missingiut.